

說

郭

續

說郭續目錄

弓第二十九

明經會約 林希思

讀書社約 丁奇遇

林間社約 馮時可

勝蓮社約 虞存熙

生日會約 高兆麟

月會約 嚴武順

紅雲社約 徐燊

紅雲續約

謝肇淛

浣俗約

李日華

運泉約

李日華

霞外雜俎

錢謙益道人

韋弦佩

屠本峻

禪門本草補

袁中道

蘇氏家語

蘇士滄

韻史

陳梁

明經會約

莆中林希恩

林子曰古之爲師者教人以修道今之爲師者教人以學文今諸生之所以從我者固專在道而我之所以與諸生者必兼以文獨不觀之仲尼之徒乎問政爲邦仕魯仕衛蓋勿學壯行聖人所不廢也况科舉之興出自國制而仲尼之聖亦曰從周是知古之君子未嘗不仕而明經之學亦當時之載質也其惟正心修身以爲兼善之地業舉遵制以爲進身之階

明經書錄
斯謂之有體有用之學大中至正之道也條列于左
諸生其惟遵而行之

一作文以四九日爲期每期作文一篇辰候至午候
而止諸生所習之經不同會日俱作四書文經文隨
便自作

一作文以理爲主氣輔之平淡中取奇詞苑之巨匠
也蘇子瞻曰凡作文字少小時須令氣象蟬噪采色
絢爛漸老漸熟乃造平淡其實不是平淡乃絢爛之
極也真可謂文章之評矣近來作文者不會漢人六

代之意湯襲漢人六代之詞自以爲高古美麗又有
一等專用新奇之字文以艱深之詞斷手截足令人
難句爲高是皆才不足而氣不昌故不得已假此以
取名爾今後作文理要精微氣要昌大轉折處亦要
圓活然此非可以易言也蓋由養之於內既至而後
發之於詞自順矣故曰有德者必有言諸生毋徒求
之文字之間可也

一看書每日上午四書下午本經各一葉半所看書
白文務要熟誦小註亦要熟誦

一讀書每十日義二篇論策表各一篇

一每月四九日下午會齊明經堂先將本日所作之
文私相筆削批點然後呈覽覽畢聽掣籤背經書白
文得籤者卽背首五句依次左旋各背五句周而復
始至所看書畢而止次掣籤講說經書每掣二人相
爲問難若講解不明另舉一人再講餘者靜坐以聽
毋得謬言以亂規矩其所講者只要發明本文及體
貼小註截段明白若有疑者先書於起止簿上俟講
書畢時問難且便掣籤時查考又次掣籤背義論策

表只掣三人務要應聲朗誦十數句

一各備起止簿書所讀某義論策表若干所看某經書若干以便查考

一會日俱早膳後來午膳要回家不必輪流辦會務以恬淡省事爲主

一遇期有事預先稟明

一自立會之後除會期外不必相爲往來其親友之禮所不可廢者朔望寬假一日免看經書

一背書掣籤若有事時或令東揚仰先代攝

一書程甚簡中間有不能自解經旨欲從他師及私
加作論策表等文讀五經性理鑑綱目等書者聽之
一諸生務要除去惡習私齋中不許招集外人及議
人是非長短

一言語貴簡當以忠信爲主衣服貴莊又以質素爲
先

一不許飲酒及街坊遊戲以蕩心性以妨書程

一讀書以有常爲貴不宜困憊精神諸生於大暑三
伏之時夜分不必讀書務要靜坐養心餘時至一

而止一鼓之後亦要靜坐養心

一崇禮堂條示諸生者與外人相爲往來云若會中有吉事或召燕更宜恬淡不必殺牲每席務要四人五肴二菜麵湯一行麵食二碟清酒一壺先期惟具單帖至期自來毋俟催速凡吉凶大禮衆惟具一果酌行之所謂君子之交淡若水也諸生其體之

一奠召公名也而周公乃曰君奠貴其質也後世因字而諱其名復因號而諱其字今後須以字相呼其惟於少者則字之於長者則字而兄之此亦古人之

質也

一諸生實有弟兄之義坐次不必分主客惟以齒爲序若不便於他賓則因時而異其理可

一朔望日下午或登東山及附郭之有勝境者以效曾點浴沂風雩之樂晚膳後俱至明經堂或誦四書一章或歌詩一篇要皆切我心性者

讀書社約

武林丁奇遇

社曷不以文命而以讀書命子輿氏所稱文會正讀書也今人止以操觚爲會是猶獵社田而忘簡賦食社飯而忘黍盛本之不治其能興乎吾黨二三士既有社以誓衆矣苟美賦不興將於吾黨問焉其何辭之有董子讀書不窺園幼安讀書席着膝處穿二子者一爲兩漢之精兵一爲儉歲之嘉穀願吾黨效之有以應世也故特結爲讀書之社今當申約二三士

其明聽焉約曰一定讀書之志記曰宵雅肄三官其始也古人之志明在事君但徒懷貪慕非爲有志今須如求饗餐母或暫忘如守苗畝母爲虛望廂月築磬溪璜自出中有潛通之者吾黨勗之二嚴讀書之功記曰入學鼓篋孫其業也每日晨興當念此語宛如樂正綬數司成待說凡進一篇須義事辭三者應口在心方可釋手不得托言大意徒存恍惚日須有計月須有要可聽稽查不得隨意逍遙散亂無帙三微讀書之言有實者必有文若筆枯心澁漫言長卿

制作語艱意僻自待桓譚賞鑒二者不獨違時於已
何當卽不必七步倚馬要使風簷閒適卽不必諧聲
俳偶要與人意相通今有刻燭之罰載簡之筆當共
策成四治讀書之心治業不治心譬彼莠田嘉苗難
立世路維莠奪我書苗絕世之根在節與淡節高神
表古人來儀欲淡意明心珠自現此群書之府文采
之源也故願吾黨爲人不可一步踏入世中亦不可
令世一點漏入身中要其大端曰養節氣審心地凡
在社中互相攻治二三十士其旣聽矣乃更申曰自盟

之後守此四章群居索處毋異其心始於今日終於
終身

啟

敬啟吾黨以文章之業媚茲山川不能隔人耳目矣
光華相起氣若吹蘭歲月漸深味如食蔗然同聲之
應雖親麗澤之功未至品目徒高恐成馳騫形神自
顧懼就蹉跎不惟德業可慚亦復因緣可惜茲特結
爲讀書之社志在同升功期合砥月相計要歲各觀
展一篇落紙必共披吟一書發篋必通譚論蓋方以

衆而愈盛意以競而日新精神所聚定生異寶則山
川當護此社矣若此庶幾生不虛同想亦世所藉慰
敢請斯盟幸報使者

林間社約

吳郡馮時可

余素不侈味牛羊犬豕皆不入口於豕獨食其肉傍
菜爾家所畜小牲於鷄最戒不以入庖爲具五德也
鷄雖不戒而匪所嗜鴨雖列膳而未嘗宰於魚戒二
鯉及無鱗者有足者鰕蜆之類以傷命多皆置不設
果核獨龍眼爲常餐蓮實梨藕或時爲供其餘未嘗
一沾唇每日晨起進白粥二甌午進飯如晨嘗肉不
一二嚮至脯復進粥減晨之半皆不設饌或留客不

過三味自遠至者不過五味嘗與社中客相約以是爲準客少之曰子柰何當擊鮮飲醇之際而以飯蔬飲水律人耶余曰不聞禮有以少爲貴乎六清五齊不貴於玄水三鸞七醴不貴乎太羹聖人所以導民古也人心之危若水然水溢則無所不決欲恣則無所不流欲流而性失矣故曰萬人操弧共射一招招無不中萬物章章以害一生生無不傷夫世人以用物爲享以多用爲豪而不知物多用則多戕然其害也卒以自傷是與物相爲羶虎也是故聖人重禮而

瑋愆貴明信而厭繁縟苟有明信則溪毛可供潦水
可薦苟無明信卽百年五鼎亦奚以爲大禹不厭非
食孔子變色盛饌士而不能約於茲也尚何譏道之
有故願與吾黨相勉之也

社約後記

余旣與客約爲社客請余爲則余曰禮貴稽古情貴
率真楸葉兔首不以爲薄維筍及蒲不以爲簡詩所
志也請自今一以約爲則會期無定以月盈爲期晨
而集酉而罷至無踰午踰則罰飲不卜夜卜則罰從

者無越三人越則罰客盡集則進飯二殺二藪飯已
進茗客或博或奕或行或卧或默坐或清談惟所欲
但不賦詩不談時事古卿大夫之燕多稱引古詩不
自賦也稱詩以見志賦詩以競能競則乖和非合替
之道談時事恐犯盡言戒且已爲物外遊矣又何計
物短長是二戒者誤犯亦罰午飯旣已良久再設置
二盒於几進鮮菓二又進三殺三藪美如之餅餌亦
如之從者各百錢舁夫五十錢或以酒食勞者聽大
抵會以合群群者人道所貴也中琴瑟而外墳篋先

白水而後青松貴能推引賤能緩急無締始滄林龜
諛面憎背斯所謂能善其羣君子之會也如僅以麀
酒爲歡極味爲敬則所謂飲食之人君子所賤者而
胡以會哉

勝蓮社約

武林虞淳熙

西湖南宋放生池也豐碑屹立道上第飛泳亭廢耳
亭以飛泳名將取山光鳥悅濠遊魚樂然異熟果成
樊籠錡釜中幾許能全卽不幸復投網罟猶冀重贖
更生便令折翮困鱗隨放隨滅托文漪而如蛻不愈
糜爛沸湯地獄乎昔有胎生之類夢乞免胎就戮彼
亦安取長生人誰無死度所期政自有限當垂絕時
幸可須臾無死輒復望救今於耶生乃三人之未必

全活遂加訕笑一何不善推類如此社友以放生來
或者無生可放僅僅隨喜倘自識多費少益耶請一
思之此後至社者必攜飛泳之類來所費醵錢自一
銖至累鎰無量但空手如昨罰銀一錢罰欠會或當
日贖生既各放生不得不稍稍綜核也社定錢湖舟
中間詣上方池淨慈萬工池昭慶香華池期以每月
六齋日會首傳帖錄金授典座自修供具凡會首認
定開後坐以齒緇素各爲行三寶前不必讓遠客
是日所費世財專爲放生若勳指嘉肴豐膳何不烹

魚炮鼈脯鳧煮鴈乃求膠筍蒲藜藿耶此後會首視
醪法徵分銀五分辰集解維每一案設果核粉麵食
共四器器用一尺盤午齋蔬四器有副四人共之飯
至湯一甌哺時歸舟用茶食亦止四器長日用煮麵
各一甌侑以蔬四器不設果也擇一典座代設毋召
族庖庶不同異違約罰銀一錢侍者任携幾人每一
人持米半升付典座不如式減典座銀

是日用樓船一如容集多加中船一其值會首出焉
勞典座銀一錢賞傳帖人一錢亦會首出傳帖先五

日發分金卽付使者使者卽付典座欲令早知人數
不浪費耳違約罰銀五分

是日也會首唱言加持放生畢請各念阿彌陀佛號
千聲或淨坐默念毋競談俗諦以瀾淨衆念佛畢會
首供茶放生之前供茶之後稍自恣所以爾者恐諸
君攢眉去也違約罰銀一錢

是日以事不至明註帖下令人持贖生之金投會首
覓分金去會所近不終事而去者罰銀五分社友自
選方來萍水相逢踪跡難問今後經過下里請先禮

大師大師使人云某在斯庶便相期

罰金會首貯贖生明載於籍當罰不罰罰會首如其
數匿不贖生罰如數罰金卽投會首遞五日倍罰衆
議立此清規取裁自大師而淳熙操筆書焉幸鑒公
心何敢爭長

生日會約

虎林高兆麟

今人於誕日延集賓朋呼優稱觴不論家之有無一以侈盛爲貴曾記往昔以年高分尊方做生日今則二十三十雖在卑幼亦做矣往昔凡遇齊頭必至七十八十以及五六十方做今則年年而做之矣人之肯做生日如此所以重吾生也夫必有身而後有生重吾生者所以重吾身也抑思此身何自而來乎非祖宗所遺乎然而祖宗徃矣而祖宗之心念注在子

孫凡我昆弟伯叔以至宗族孰非祖宗之遺孰非祖宗心念所注能以重吾生重吾身之心一仰思於祖宗併體祖宗心念所注以推及昆弟叔伯宗族方爲真重吾身方爲不虛此生雖年年做生日不碍矣今以此意定爲生日會是會也不論尊卑長幼凡遇生日派分有三上者五分次三分再次二分在尊長則呼卑幼而飲之在卑幼則奉尊長而祝之置簿一扇輪一直會一月一轉如此則常常相聚意氣聯屬或不聞祖德者則問之尊長或不諳世故者一型于大

方仁義之訓日聞禮法之防自謹且有學問商量有
緩急倚賴面熟而心自齊情真而氣自洽必不至踰
越規矩敗壞倫常以自安於浮薄甘爲名教中之罪
人矣夫人而爲名教之罪人身將不保非自棄其身
乃棄吾祖宗所遺之身於生日何有焉必如此重身
敬祖敦宗族厚風教數善兼備則亦何憚而不爲耶
願自吾門始之孟子論鄉井而曰出入相友守望相
助鄉且如此況於族乎況爲身以敦族乎我知人必
樂之矣又如每房生子是添丁之喜亦吾祖宗心念

所注血食所關如例舉焉未爲不可

昔人有真率會當時會僚友且然而況宗族夫真
率宜莫真率於宗族矣只宜照分設館務期可口
飽腹爲止若侈張便不得名真率規例十二則附
後

凡例十二則

一是會專在敦倫非取飲酒宴樂務期人人畢集俗
例常有寧可人不到而分要到是重分不重人今此
專在聚人縱分可以不到人不可以不到分不到罰
五分人不到罰壹錢

一是會務期久遠此舉雖創自麟意會聞先世有行
之者矣柰何中葉而廢以前律後不令人視今猶昔
之感耶唯是行止全係乎人所謂人存而政自舉凡
我前輩後進錚錚不乏豈甘自棄以致中墜諄切諄

切

一是會專尚儉朴或遵五簋或取三養不然先設題數盂再佐小碟供飲務期便於舉行安於人情爲止再不然人多分少總待一月之中或二人合舉卽一月之中若無同壽者亦不妨再俟以三人爲率總是權宜經久之計

一是會謹循禮法凡遇尊長生日子姪斷宜竭誠登堂稱祝如不到者罰五錢

一是會分禮有節凡遇散壽則照數捐分若正壽則

於常分之外加一倍焉

一是會規矩一定凡遇壽期先五日發單歛分而值會之法一月輪一人司之庶無紊亂遺忘之弊其有宜發單而不發單者罰貳錢

一是會務遵謙讓宗族讌會不比尋常聚飲觥籌交錯之間更宜寓以禮讓相先之意不得泛習虛浮偶因盃酒而盛氣相加如蹈此轍者罰參錢

一是會登記宜詳每年置簿一扇登記聚會併人數分數以驗會中增盛之美如簿到不登記者罰壹錢

併簿遺失者罰壹兩

一是會立法甚嚴凡一切哥銀俱於次日值會者徵出貯於五房當舖之中以俟公舉之費如徵不出者合族坐徵無致中阻以期遵守或日以卑幼而罰尊長似爲未便不知尊長以禮自持必不致罰卽或偶有之值會者須稟過族長遵族長之命徃徵是情理之甚當而事之極可行者

一是會成人入會凡某位生幾子某人幾歲俱開載簿上以便查其至十六歲卽斂分入會定爲永例不

致遺漏躲避

一是會添丁宜慶遇某房添丁值會者卽登記生年月日於簿以兆生生不已之慶隨發單欵分舉賀如

例

一是會交接有序如前月某人直會下月交送某人其一一事體開載如例又書某月某人交與某位掌管如此寫記明白庶不至差錯起推諉之弊矣

右十二則可謂詳之詳矣原以聚會爲美非欲以本枝一葉漠然如行道之人一切不相關切甚且

等而下之流爲澆薄蹈習市井平常不覺一當聚會便爾手忙脚亂無安身之處如是者非無人吾見亦屢矣縱其人不足惜追念祖宗忍見斯狀然所以致是者總是平日不開格言正論不見尊輩長者雖欲不如是不可得也麟今創是要見何心且派分旣分設席又合稱家有無各隨其便非強人以所難也凡我賢達宜深維之御李山人麟又

跋

月會約

武林嚴武順

約

竊惟不易得者良友最難聞者好言顧勝理每自談
生深懷亦從迹見相思空說何如面接爲親獨坐微
研豈若耳提更快所謂三秋如隔一夕足多非虛語
也倘情濶則蒙生彼此或有不與聞之事而緒遼必
他續心口遂有不及吐之詞卽匪涉斯亦應慮及憶
昔北開兄一日虛緘意如失物速朝阻跡譬若無膚

且對必經時言必及義縱攢眉寂寂鬱顏亦自可親
或抵掌翩翩醉語猶堪作式惜乎喪吾儕之領袖失
後輩之典刑也此者各按起居不免離索晤因冗歛
集以貧稀必公聚始俱而私懼不再每相視而散既
如水中偶值之魚或遊隊而譁復似野外忽群之鹿
我輩業已若是子孫更當何如向子將兄有意振衰
欲以一月一會第諸君無人側首不知何日何年今
長至後偶集文似堂祇我同盟空諸別侶都無應酬
之態遂極家人之歡就此初緣可理舊議願從茲以

往皆不速而來豈是借他人酒杯政爾親自家骨肉
方且賞文析義可延益于神明即使撰杖酬觥亦抒
情于晤覲曾記家印持兄有云我輩一月內晤言之
日多則八九少僅二三縱都至白頭計一生相聚亦
不過數年耳言之增感遂以助情知有同心定能如
約約如左

斟酌

漫約旣恐鼓衰而成淪決期又慮費羞而湊冗今就
六齋隨一日定而不執寬而有程或後或前自籌

消息且遲且速共酌閒忙庶垂老可避竊比真率之
會而持齋不破猶存蓮社之風

通序

迭爲賓主莫如兄弟人共四姓會作九班三郤三會
三嚴三會三間并識西共三會相間而舉相續不斷
政于迹有往來更見心無人我且使母妻各熟其營
咳亦令童僕交致其慇懃

簡牝

此會唯取團樂非誇餽飮素猶愧飽芹菹并服鮮菜

消清乃生狂米汁與菜根偏稱品母踰六飲可二象
樂在蔬水之中老我蘆桂之性如其瓶罄不妨濁酒
半壺倘爾厨寒自可青鹽數粒誠一觴一詠澹而忘
歸卽三白三毛戲不爲虐

正歡

聚首之樂旣暢群居之戒可虞要以寃性爲先不則
五倫當晰又以會文爲切不則六藝可遊一月豈無
可見之功同學應有弗如之嘆必阿蒙非昔始無慚
刮目相看倘聖質如初亦何貴開口而笑是日各稽

功過明示勸懲設有懿聞佳話可命穎客精生

彰禁

非徒卜夜之飲宜爲竟日之歡留連應勝于陳遵需
緩莫同于莊賈縱有事如蠟且讓今朝欲相爭如虎
請俟異日毋以雌黃爲月且毋以穢雜爲風流恐子
弟輩錯認定盤針悞捉談塵柄因爲設禁幸勿踰關
犯者隨納放生銀五分輕則立飲悶氣酒三爵

隄流

人無別客庄在本家主與忽生或可多方跌蕩眾期

已定必無他故遊移惟是同調適逢不妨闖入莫謂
世情當了卽此招來蓋規便而強難事將不繼倘增
外而減內神必不全誠簡則易從專乃可久非墮行
于孤示人以隘也

疏

李流芳

長蘅

往見忍公月會之語心竊善之以爲行葦伐木之誼
備見於此意欲做而行之湖上兄弟參辰相間雖在
五百里外而氣類之感天涯比隣聞聲相思酌酒如

對且喜今年余來湖上夏秋之交兩與茲會飲食衍
衍言笑晏晏覩面之得深於所期會余留連山中荏
苒冬令浹旬以來良晤踈曠言念茲會亦復屆期諸
君里閭之集來往無時而余萍海之蹤交臂可惜與
爲別後無益之思何如只今相對之樂乾饌以愆雖
非所任伊蒲之供我亦能設是用躉假名山之靈權
爲一日之主若溷乃公於城市之內我實不堪將置
公等於泉石之間定復不惡已從孟陽乞斗酒命平
頭治蔬菽期以廿有三日會於靈鷲之祇園精舍便

當襟被而來且爲卜夜之舉蓮峯紅葉尚未隨風
嶮清音與堪送日人地相得自昔爲難便可寫之丹
青傳之歌詠川作千古美談豈徒一時勝事而已其
不至與後至之罰一如會中律令余不敢干

啓

嚴武順

曩者順以婚嫁未畢繼因貧病相連遂愆月會之期
竟成日遠之隔罪真莫贖情或可原每聞鳴雁之嘹
嘹益重負病之喀喀歲旣云莫盟豈容寒茲大比喜

陽回於長至且四兄惜將別於隆冬况渡任禮始三
加是五六人中忽又添一冠者雖弟與無敎識西愁
無七發然團樂坐上何妨着幾病夫願此新踪應修
舊好訂期明日願撥他緣

又啓

嚴武順

順因租事久作鄉人言歸歲終遂遲月會然猶餘齋
日可訂歡期雖在百忙之中應偷一夕之暇特期詰
旦共集於廬或難晝來不妨夜話快茲小盡堪爲守

歲之歡恍若新正先作賀節之飲請看隔日便是明年今人已非昔人月會將成歲會願賜憐允勿怪慢期

重訂啓

聞啓祥

子將

人生臭味莫過道德性命山水文章而二三兄弟兼之無生不同時之慨有望衡對宇之樂稽生命駕旣爾徒勞陶令移居亦爲多事豈曰人作之合實惟天假其緣吾輩處此可謂幸矣顧邇來神情雖密踪跡

常踈見固比於河清投足擬之漢廣縱衣裾偶撇袂
倏來倏去殊少從容或杯酒暫交亦人笑人啼無關
神理遂使形神有不親之嘆爾我多未盡之懷蒹葭
白露之感空盈屋梁落月之思徒切良以世緣未斷
交際如雨點之多俗氣不除周旋類繭絲之縛來無
不往報或後施戚每見原䟽恒獲罪既有所煎迫於
彼自不遑優游於此日不暇給神不借來蓋勢乃使
然非情之得已也獨念歲月易道同人難值以真精
神委之輪蹄竿尺洵矣堪嗟以好兄弟付之南北馬

學誠哉可惜老親在上幼累紛然卽不能如沮溺耦
新山丘無功子長永依河渚乃襟情曲室之詠風雨
壽床之眠曾爲歡之幾何亦棄置而不問是何心哉
良足嘆也昔有月會行之數年寒暑不愆少長咸集
上之講道論德旣足祛練神明次亦咏月嘲風不失
流連光景每多玄契間一火攻心本無他劉四罵人
不恨意誠不可阿萬裂眼何妨忘懷竊比家人有爭
愈見君子嚴恐李長作疏輝映後先譚友黃介賦詩
流傳遠邇真千古之快事一時之美談何意今茲遂

成廢闕念邈會者爲吾弟子與則已宿草芊芊慨預
會者有老友季和亦復微音邈邈顧此萍飄電散彌
覺貪會情離且君輩因多鳳麟吾家亦有豚犬要使
漸聆磬咳知父事之有人熟睹典型識師墓之攸寄
固諸兄弟之夙念尤不肖祥之私衷也第按月一行
不無少費攻苦者或嫌期會太逼空乏者或慮供億
稍煩毋已易以季終佐之薄分庶衆擎斯易舉亦期
簡則必遵若吾輩老兄弟則仍一月一會各携肴二
器酒一壺祇博竟夕團樂無須終日只是家常茶飯

不費一錢人務依約而來會必盡歡而罷此外若真
與偶到莫嫌夜月頻呼至期倘良友忽違何借明燈
共對勿构成例一任便宜惟諸兄弟三復此言諦思
夙誼勉旃自勗指皦日以爲盟毋或相忘視息壤之
在彼謹啓

又啓

嚴武順

月會自仲錫兄正月舉行之後便爾廢闕蓋因四兄
振起者既在居憂大兄值期者又當侍疾遂浸而踰

月會約

八

八

季倏已半年嗟去日之如流悟爲歡之及早順擬越
雁行之次敢云弟可先兄陳魚麗之章誰謂人將拒
我又向者有日以盛恐開難繼之端人來何遲覺鮮
有親之益茲五筭猶充以素請始自臆望雙鳧無逮
於哺約章如漢謹啓

紅雲社約

晉安徐燭

清異錄云劉張每年於荔支熟時設紅雲宴余恒想其風致吾聞荔子甲于嶺南巴蜀今歲雨暘時若荔子花頭甚繁樹梢結果累累欲紅自夏至以及中秋隨早晚有佳品今約諸君作食荔支會善啖者許入不喜食者請毋相溷先定勝地名品以告同志乎遠臺法雲寺白密二樹異品也必先半月向主僧買其樹熟時往食本宗上人主之西禪中冠甲于城內外

馬恭敏賜葬之所極繁極美馬季聲主之尚榦滿林
香香倍衆品唯林氏有三五樹非至親往求不得入
城陳伯孺所居與林氏至近伯孺主之廢盤大如鷄
子高景倩東山別業有此種今歲生尤繁盛景倩主
之風岡中冠爲福州第一品必至其地始得選食但
路隔一水非舟楫莫至謝在杭主之勝畫出長樂六
都更有一種雞引子亦出六都同時而出在杭長樂
產也再主之綠玉齋前新植一株楓亭種也今歲結
實不甚多食畢足以他品余主之楓亭荔子名甲天

下核小香濃一日一夜可達會城色香未變周喬卿
莆人也主之桂林一種味極甘美凌晨皆於萬壽橋
貨鬻間有挑入城者吳元化鄭孟麟主之會只七八
人太多則語喧荔約二千顆太少則不飽會設清酒
白飯茗茗及肴核數器而已不得沉湎濫觴混淆腸
胃每會必覓清涼之地分題賦詩盡一日之遊願同
志者守之萬曆戊申夏至前十日題

紅雲續約

閩郡謝肇湖

余自壬辰離閩丙午始返十有五年未獲啜故園荔
子每一思之常津津齒咽間也迨丁未夏無荔卽有
一二僅慰足音未能果腹越歲戊申荔始大有年而
社中諸子鱗次比集因思晉安此品甲於宇內幸而
生長其地又幸而十七載始逢其熟也河清難俟髮
且種種明年之馬首北矣可虛此日月乎於是社中
諸子唱爲餐荔會而不佞復條所未盡者如左以與

同志者共守焉

一初出市則新香可愛勿嫌味酸勿憚價貴當集同志一噉以開勝會之端

一政滿市則光景難虛勿畏性熱勿憚會頻當連數日共噉以極行樂之致

一將罷市則殘紅可惜勿厭冷落勿憚搜尋當倒筐筥盡噉以成美事之終

一譜志記載甚多會城種類有限沿街擔負皆園林採拾之餘村落家藏多耳目罕見之種跬步所限終

無染指之期一品未收已有遺珠之歎凡我同志幸
悉鄙懷或奇植異名傳乘弗載或家傳手誦羔鴈所
遺母論遠近各採數穎以廣異聞兼闡幽鬱

一同志諸子嗜有濃淡性有豐約縱勉強破慳於一
時終隱忍生真於他日乾候失德雅道衰矣不佞之
約主不必一人人不必皆備或餘勇可賈連司累日
之盟或百足不僵共鳩一時之集憚煩而願去者聽
慕風而來參者許要以行樂及時何用在生畦畝亦
恐風景少殺不無貽笑山林

一人皆同心會主真率在家少加酒饌一二以佐笑
談出外遊者唯携餅茗數具以防饑渴蓋簡則携易
坦則意洽用約則後會可繼品少則正位不分要爲
側生賞音非作措大面孔也

一聚會旣數功課當嚴若徒稱雄善啖則昨隸皆可
登壇縱使濡忍腐毫卽廝養亦嗤上水今置一簿携
以自隨每會先記日月勝地次列同集姓名主人分
體拈題坐客卽席抽思雖濶色或需他日而草創必
限尅期詩不成者記姓名於簿以行簿罰無恃頑化

外致取笑筆端

一名剛雅會樂事賞心雖形骸已盡蠲除而言語當
忌穢雜或徵僻事或歌古詩誦人間未見之書談字
內瑰奇之事間有雅諺何妨絕倒勿言朝廷時政勿
作市里猥談勿陰說短長勿互相攻擊勿故爲狂態
亂恣喧嘩勿強作解事妄加評品此雖一時萍蹤便
是千古話柄無令惠州三百顆擅美當時更恐王家
十八娘見笑地下耳

浣俗約

構李李日華

戲作主人俗狀揭之齋壁以告賓友曰浣俗主人述
喜客客亦喜與之遊頗潔一室雜置圖史又於庭際
稍藝蕙蘭列松石爲客談笑之侑期於薰德頌益以
浣俗情顧顛鄙之性有百浣不能去者每一觸發則
悒悒不自制或恐終以连客不敢不暴其俗狀以希
高明之宥維海納污維山藏疾庶幾終事君子
架有書帙不喜人翻閱

凡有文玩就視無不可或拈美顛倒則意甚不憚一
間出汰書名畫相賞閱評隲臧否無不可詰所從來
與其直之幾何則意甚不憚

容誤意主人之藝徵詩徵繪徵書無不可若轉觀賞
路與爲不識人號與授意旨與刻期敦通則雅不能
奉命

客所徵索書繪或絹或紙或便面無不可然絹或疏
薄紙或粗厲扇或薰金濫惡與深青老黃大紅諸俗
箋則不能奉命

庭際芳草可步奇石可撫幽花可玩或折莖摘瓣甚
或乞分移植則意甚恹惜或忿然見詞色客或過寵
主人肯饗主人之疏糲卽領牀頭釀無所恹醉而假
搨無不可過縱而至作灌夫狀則嗣後不敢復進杯

水

客或全集戶外履滿主人益快躬煉茗以進無倦色
客或令從者擁侍則不能從命凡此昔主人不可醫
之俗也然又有甚俗甚痴卽和扁無所効其治者曰
借書借帖客或念卜商吝蓋尼父曲全不深督過之

流俗約

八

乎則奉教何窮極矣流俗主人頓首白

二

運泉約

構李李日華

昔輩竹雪神期松風齒頰暫隨飲啄人間終擬消搖
物外名山未卽塵海何辭然而搜奇煉句波瀝易枯
滌滯洗蒙茗泉不廢丹圓百片喜折魚緘槐火一簪
驚翻蟹服陸季疵之著述旣奉典刑張又新之編摩
能無鼓吹昔衛公宦達中書頗煩逝水杜老潛居夔
峽險叫濕雲今者環處惠麓踰二百里而遙問渡淞
陵不三四日而致登新捐舊轉手妙若輓轆取便費

廉用力省於桔槔凡吾清士咸赴嘉盟竹巖居士題
運惠水每罈值舟力費銀三分

罈精者每個價三分稍粗者二分罈蓋或三厘或
四厘自備不計

水至走報各友令人自擡

每月上旬欵銀中甸運水月運一次以致清新
願者書號於左以便登冊併開罈數如數付銀

尊號 用水 罈

月 日付

松雨齋主人謹訂

霞外雜俎

鐵腳道人

快活無憂散

除煩惱

斷妄想

右二味等分爲極細末用清靜湯調服此方藥味雖妙奏功極大且藥性不寒不熱不苦不辛不必遠求之產藥之區自我求之自我得之雖神農本草所未載東垣丹絳諸老所未論及自是人間一種妙藥苟能日服一劑勝服四君子湯百劑也凡

合此藥先要酒掃一靜室牕櫺虛朗前列小檻栽
花種竹貯水養魚室中設一几一榻一蒲團每日
跏趺靜坐瞑目調息將前藥服之至三炷香久任
意所適或散步空庭吟弄風月或展玩法帖名畫
或歌古詩二三首倦則啜苦茗一甌就枕偃息久
从覺神氣清爽天君泰然不知人間有煩惱不見
我心有妄想斯則効可觀矣

寧氣湯 專治一切客氣怒氣怨氣抑鬱不平之症

先用一箇忍字

後用一箇忘字

右二味和均用不語唾送下此方先之以忍可也
一朝之忿也繼之以忘可無終身之患也服後更
飲醇酒五七杯使醺然半酣尤佳

九字經

勿欺心 勿妄語 守廉恥

此經字約而義博知之甚易行之甚難苟能實踐
可爲君子

警身纂要

十五條

言行要留好樣與兒孫心術不可得罪於天地

毋以嗜慾殺身毋以貨財殺子孫

積金以遺子孫子孫未必能守積書以遺子孫子孫未必能讀不如積陰德於冥冥之中以爲子孫長久之計

留不盡之巧以還造化留不盡之福以與子孫

萬事隨緣卽是安樂法

人身元氣亦有升降于時生于腎中此卽天地一陽初動感而遂通乃復卦也自此後漸漸升至泥丸午時自泥丸下降于心成亥歸于腹中此卽天地六陰

窮極百蟲閉關草木歸根寂然不動乃坤卦也靜極復動循環無端其至妙又在坤復之交一動一靜之間卽亥末子初之時故屈原遠遊篇曰壹氣孔神兮於中夜存虛以待之兮無爲之先朱子每謂此言廣成子告黃帝不過如此陰符經曰自然之道靜故天地萬物生朱子曰此二句極說得好靜能生動若不靜則天地萬物不生養生者當順其時而行坤復二卦之功

人身元神出入月中五臟精華亦聚於目故陰符經

曰機在目道德經曰不見可欲而心不亂是以內養之法常要兩目垂簾返光內照降心火于丹田使神氣相抱故太玄養初一日藏心于淵美厥靈根測曰藏心于淵神不外也

心牽於事火動於中

有動於中必搖其精

心靜則息自調靜久則息自定

滅心以養氣息機以滅心

精氣神爲內三寶耳目爲外三寶常使內三寶不

運物而流外三寶不誘中而擾

呼吸要綿綿深入丹田

常要使呼吸爲夫婦神氣爲夫婦蓋夫婦云者欲其相合而不相離也

毋勞汝形毋搖汝精毋使汝思慮管管寡思慮以養神寡嗜慾以養精寡言語以養氣

久視傷心損血久坐傷脾損肉久立傷腎損骨久臥傷肺損氣久行傷肝損筋

坐處不可太明太明則傷魂不可太暗太暗則傷魄

尤忌濕氣賊風

心有所愛不可深愛心有所憎不可深憎

髮多梳則令人明目去風體多浴則令人倦怠

春夏宜早起秋冬宜宴眠宴忌日出後早起雞鳴前也

大小便宜緊閉口齒日上視使氣不泄

遇小疾可行五段錦或用六字氣法

每夜以手擦湧泉穴左右各三百甚益下元

五味淡薄令人神爽氣清少病酸多傷脾鹹多傷心

苦多傷腎辛多傷肝尤忌生冷硬物

飲食不可過多不可太速

切忌空心茶飯後酒黃昏飯

夜深不可醉不可飽不可遠行

怒後不可便食食後不可發怒

軟蒸飯爛煮肉少飲酒獨自宿此養生之妙法也

凡早行須飲酒一甌以禦霜霧之毒無酒嚼生姜一

片亦可

飯後徐徐行數十步以手摩而摩脇摩腹仰面呵氣

四五口能去飲食之毒

傷食飽脹可緊閉口齒聳肩上視提氣至咽喉少頃復降入丹田如此升降四五次即消化矣

臨睡用石膏花椒或青鹽爲末擦齒用好茶漱之叩齒數通一日飲食之毒不留齒間終身無齒疾

跋

東谷子曰予得此書嘗物色所謂鐵腳道人者有楚客言二十年前曾見道人於荆南虬髯玉貌侗儻不羈人也嘗愛赤脚走雪中興發則朗誦南華秋水真

又愛嚼梅花滿口和雪嚙之或問嚙此何爲道人曰
吾欲寒香沁人肺腑其後去採藥衡嶽夜半登祝融
峰觀日出乃仰天大叫曰雲海盪吾心海居無何飄
然而去莫知所之或曰道人姓杜氏名異才魏人

韋弦佩序

性急者佩韋性緩者佩弦聖人以此和劑於民使協中庸之軌也當其無所於觸則怵然惕然血氣之勇肆矣尼茂如當其有所於觸則怵然惕然血氣之勇肆矣尼父曰見義不爲無勇也又曰小人有勇而無義則亂故知義理者君子所尚血氣者小人所乘吾常省躬不無反是此韋弦佩者故父師之所謂迪也處方艾觀藥鏡却病萃以成書屠木峻撰

韋弦佩

甬上屏本晚

處方第一

中林之士有五不治之疵有七可處之方其樂天
知命安穩自在不犯五疵者上也紛華易染定力
不堅或犯一二者中也利欲薰陶肝胆差別全犯
五疵者下矣請列五疵假修隱逸獨鼓虛聲一疵
也口挂雲林心謝煙壑二疵也浪語考槃極情壘
斷三疵也厭苦寂寥轉深涼熱四疵也顛談游道

冀買山錢五疋也此五疋神農岐伯所未論之証
本草綱經所不載之藥又安能鍼砭哉立此方爲
標本願醫我山林同躋壽域云爾

和氣湯 治一切客氣怒氣怨氣抑鬱不平之氣

忍字一個

忘字一個

用不語唾送下先之以忍可免一朝之患也繼之
以忘可無終身之戚也更飲醇酒數杯使醺然半

酣尤妙

忘性
幽事

快活無憂散

除煩惱

斷妄想

合此藥洒掃靜室窻楞虛朗前列小檻栽花植竹
貯水養魚室中設几榻蒲團跏趺調息將前藥用
清淨湯調服至三炷香久任意所適吟弄風月展
玩法帖各盡小說倦則啜茗就枕偃息久之覺
神氣爽泰不知人間有煩惱不見我心有妄想則

神効可觀矣

此修
神事

處窮方

顏瓘戰國時人隱居不仕常言處窮方其

藥四味

後四妙法黃丹中有
六字經九字經兼看

本草

入

二

一無事以當貧

二早寢以當富

三安步以當車

四晚食以當肉

右四味和勻夏日水冬日湯隨意飲之

魏林玉露

一味長生飲 蘇東坡云無事靜坐一日似兩日若處此生常似今日得年七十便是百四十歲人世間何物能有此効既無反惡又省藥錢此方人人收得苦無好湯使冬嚙不下

靜坐一味

遇便行之或止觀或納息任意 胡荅溪云予連

蹇選調四十年在官日少在家日多固知靜坐之
味弟尙平婚嫁之志未畢韓愈啼號之患方劇正
無奸湯使嚙不下也

詩林
廣記

六味治目方 積勞致目青者閉目養神去翳習靜
專修止觀不用藥攻昔晉范武子常患目病就中
書侍郎張湛求方湛因勸之曰古方朱陽里子授
魯東門伯東門伯授左丘明丘明遂世世相傳及
漢杜子夏鄭康成魏高堂隆晉左太冲並有目疾
得此方而愈

損讀書一

減思慮二

專內視三

簡外緣四

且晚起五

夜早眠六

六味熬以神火下以氣從蘊於胸中七日然後納
諸方寸修之一時近能數其睫遠視尺播之餘長
服不已洞見牆壁之外非但明日乃亦延年

吳一
于自

拂齋
記話

無此逍遙湯一治倫理難醫之証

寧耐一個

糊塗一個

學聾一個

正經三分

痴呆七分

和勻用感化湯下如前証未便卽愈再加道過一
味服之呂新吾云心不必太分曉纔分曉便是糊
塗陳眉公云留三分正經以度生七分痴呆以防
死醫倫理之要藥也

四妙誠實丹 專治拾人咳唾附人聲響聽人咳嗽使
希人意肯替人標榜及模稜兩可襲喋忿爭深情
詭秘並皆治之

守口 防意 熟思 審處

四味用不語津燕下久行不已自然真實不誑不

綺不兩舌不惡口功效難以盡述甘紫庭中丞言
責備覽云子既有不度德不中機之言深自省識
集此書爲有言責者作指南無言責者進藥石在
韋布與其行怪有迹毋寧遜世不見知也書凡四
十餘章子取其九以定方若兼誦六字經九字經
自能守口如瓶防意如城熟思審處無語無驕矣
六字經一曰忍二曰方便三曰依本分九字經曰
勿欺心勿妄想守廉耻

別本草

禪味甘性涼安心臟祛邪氣闢壅滯通血脈清神益
志駐顏色除熱惱去穢惡善解諸毒能調衆病藥生
人間但有小大皮肉骨髓精麤之異獲其精者爲良
故凡聖尊卑悉能療之餘者多於叢林中吟風咏月
世有徒輩多採聲殼爲藥食者悞人性命幽通顯密
非證者莫識不假修煉炮製一服脫其苦惱如縛發
解其功若神令人長壽故佛祖以此藥療一切衆生
病號大醫王若世明燈破諸執暗所慮迷亂幽蔽不
信病在膏肓妄染鬼神流浪生死者不可救焉傷哉

製炮灸論

湛堂準禪師與雅公爲法門昆仲因雅師述禪本草乃製炮灸論佐之

人欲延年長生絕諸病者先熟覽禪本草若不觀禪本草則不知藥之溫良不辨藥之真假而又不諳何州何縣所出者最良既不能窮其本末豈悟藥之體性耶近世有一種不讀禪本草者卽將杜漏藍作綿州附子往性見面孔相似便以爲是苦哉苦哉不惟自悞兼悞他人故使之學醫者一人傳虛萬人傳實

撥擾逐其末而不知安樂返本之源日月浸久積病
生焉漸攻四肢而害圓明常樂之體自旦及暮不能
安席遂至膏肓杜喪身命者多矣良由初學癡心師
授鹵莽不觀神本草之過也若克依此書明藥之體
性又須解如法炮製蓋炮製之法先須選其精絕者
以法水洗淨去人我葉除無明根乘八還刀向三平
等砧碎剉用性真火微焙之入四無量臼舉八金剛
杵杵八萬四千下以大悲千手眼篩篩之然後成塵
塵三末成十波羅密爲圓不拘時候煎一念相應湯

下前三三圖後三三圖除八風二見外別無所忌此藥功驗不可盡言服者方知此藥深遠之力非世間方書所載後之學醫上流試取禪本草觀之然後依配炮製合而服之其功力益不淺也

艾觀第二

諱疾忌醫醫走艾棄疾於是乎不瘳矣準釋氏例

搜十六病作艾觀

龍統肝腸向人披歷

誰能信諒

喫緊婆心對不信人

誰不增疑

率爾任事不知引避

誰不怨咎

不解偏私從彼徵逐

以我為餌

君子行義責備小人

好沒要緊

險波側媚不能敬遠

終落圈套

聽言觀行全不究心

終被簸弄

聽信庸愚代彼報復

着甚來由

密事漏泄幾敗乃公

攬禍招尤

奸謀跡畧十事九墮

自誤自家

道聽塗說自貽伊戚

惹人駁証

妄自標致擬倫勝已

秤尺在人

拒諫飾非致人指摘

終難開導

議論含糊依違枝蔓

善於託故

但務儉嗇遂致徒費

失却便宜

如尚互異強齊已論

自仗自家

武公年五十而知四十九之非是武公年九十而思黃髮老之箴規于齒垂六十有七尚不知六十六年之猶未是也昏役無記豈不虛生方遽太遲此武不早龐居士曰但願空諸所有切弗實諸所無吾以此爲觀察之資屠幽客記

幽客每爲親故居間而兩家各以軒輊不付彼懷不得者固不德而得者亦不德十六觀乃其自艾自斫歟和尚於十六觀下各加一轉語亦沒發露

僧弘忍不辱識

藥鏡第三

予嘗衰遲之前而有不慧之病歷述自恕自治自
慰各六事入藥鏡

才劣識暗不能料事

恕老駭

疑滯少斷不能處事

恕老頹

勢微力綿不能濟事

恕老朽

口訥性忘不能談事

恕老邁

神疲步蹇不能殫事

恕老鈍

拯困扶危不能應事

恕老匱

老戒微逐宜斷緣簡事君子愛人毋強所不能按楊
鐵唯常居小蓬臺不下樓自榜其門日客至不下
樓恕老懶見客不答禮恕老病客問事不對恕老
默發言無引避恕老迂飲酒不輟樂恕老狂于演
之亦以自恕

解紛無策終致兩怨

病不智

處事多忤勞而無功

病不思

遇事輒發徒易辯急

病不忍

直言匡諫不遠嫌疑

病自信

奢卒應事爲人所欺

病不疑

義形於色終致齟齬

病不量

老坐茲病宜見機明決與我同志須治所已病按劉
道原能自攻其失捫蝨新語取其近似者自攻予
亦取其似者以自攻云

按節數時猶能記事

慰老圃

讎方校石猶能親事

慰老病

考詞度曲猶能擅事

慰老景

薰爐茗椀猶能給事

慰老閒

月尊星酌猶能斂事

慰老談

采真幽討猶能從事

慰老致

老棲林壑毋廢時失事有客同好幸聚所可能按周
朗曰巖中山木時華月深池上海藻歲榮日蔓室
間軒左幸有陳書座隅奧右頗得宿酒按絃拭徽
籬方校石時復陳局露初冒爵星曉歡然不覺似
羲軒後也予又傲之亦以自慰

卻病第四

眾生八苦病居其一愚者以苦生苦如蠶作繭智
者以苦滅苦如鳥脫籠我佛慈悲開示凡夫四百
四病盡從顛倒妄見所生真直截痛快哉眾生障
深難卽解脫茲方便法門爲長生第一方武林吳
伯霖識

病有十可卻

靜觀四大原從假合

造物勞我以生遇病稍閒反生慶幸

常將不如我者巧自寬慰

宿業現前不可逃避歡喜領受

室家和睦無交謫之言

煩惱現前以死譬之

衆生各病根常自觀察克治

與竹石魚鳥相親儻然自得昨援飲羨一念不生

飲食寧少無多起居寧適無強

覓高明親友講說開懷出世之語

病有十不可治

縱恣悞淫不自珍重

窮若拘囚無滿酒之趣

怨天尤人廣生懊惱

今日預愁明日一年營計日年

室人聒噪耳目聾成荆棘

聽信師巫禱賽廣行殺戮

寢興不適飲食無度

多服湯藥盪腸胃元氣漸耗

諱疾忌醫使寒熱虛實妄投

以死爲苦與六親眷屬常生難割難捨之想

佛爲大醫王起死人而肉白骨從此方便門觀悟
沉痾霍然矣屠幽妄識

禪門本草補

公安袁中道

慧日禪師作禪門本草云禪味甘性涼安心臟祛邪
氣開壅滯通血脈清神益志駐顏色除熱惱如縛發
解其功若神令人長壽故佛祖以此藥療一切衆生
病號大藥王若世明燈破諸執暗所慮迷亂幽蔽不
信病在膏盲妄染神鬼流浪生死者不可救焉傷哉
余因效顰作諸味云

講味甘微辛性溫陰中陽也開心胃明目除積久翳

禪門本草補入

障益智不假修煉炮製但有精粗大小真贗之異須
細揀擇類破故紙者有毒不堪入藥此味遠出流沙
外漢時始入中國中國種之枝葉亦繁不似出西域
者良宜量元氣盛衰服之元氣盛者服之卽消衰者
多滯隔上舌乾口燥咽喉少津液常時痞悶令人動
氣發嗔甚者發狂尤令人腳軟不能動履中此毒者
用金剛子棘栗毬或吐或下盡吐下出宿物胸脾清
虛得汗而愈一方用大棒擊患人頭取汗亦愈無汗
者不治

戒味辛微苦回甘陳久者辛味亦盡性涼陽中陰也
須煨煉炮製極淨寘汙濁處便常用澡浴其樹或五
葉或八葉或十葉或一百二十葉大小粗細久近不
同四月八日及臘月八日採之良不可自取須曾採
者指示乃得此味號爲藥中之王能治百病不論元
氣盛衰皆宜服之元氣盛者恃強不服能至狂疾衰
者初服覺苦辣頻頻服之久自得味其藥易破宜謹
收藏護惜小破壞猶可用若大壞者不堪用也亦有
小毒偏服者損目

定味甘微辛性清涼陰中陰也安神定魄除煩熱生
津液產于深山者良亦有微毒量元氣盛衰服之元
氣盛者不拘時服俱有效衰者多服亦能損目令人
心戰怔忡或四肢軟怯喜睡眠惡見人惡聞人聲或
白日見鬼魅亦有勉強服之不爲害者然此味內有
暗毒須鍛鍊毒盡乃可入藥有大小久近之異有九
種似天棘者不佳草澤醫人採之不入官藥其有一
種土人呼爲羅漢果入藥取効差小若不揀擇悞服
如天棘類者乍得清涼直至八萬四千劫毒亦發作

發則令人下墜不可服用般若湯爲君服之最驗
淨土味甘平性清涼中和去穢惡令人美顏色長生
似蓮花有五色者青者爲最不用煅煉炮製四方俱
有生西方者良無毒不論元氣盛衰人俱宜服之元
氣盛者久服之白日飛昇衰者服之亦能輕身不死
係古來大醫王合成金丹留此靈藥屬普度世間但
其味冲澹服者多無恒又此藥屬信者則少服亦効
不信者不効若大限垂至百藥不效名醫袖手但將
此味志心服之從一服至七服無不効者最忌世間

腥穢等物若夾襪服之取効亦微

蘇氏家語

晉江蘇士潛

祖孫

漢萬石君奮歸老于家子孫爲小吏來歸謁萬石君必朝服見之不名子孫有過失不譙讓爲便坐對案不食必子孫因長老肉袒因謝改之乃許卽勝冠者在側雖燕居必冠申申如也

漢疏廣歸鄉里日令家共具酒食請族人故舊與相娛樂居歲餘廣子孫竊謂其昆弟老人廣所信愛者

請立產業基址老人暇爲言廣曰吾豈老諄不念子孫哉賢而多財則損其志愚而多財則益其過

漢楊震性廉子孫嘗蔬食步行或欲令開產業震曰使後世稱爲清白吏子孫以此遺之不亦厚乎靈帝謂震孫竒曰卿強項真楊震子孫

晉范喬字伯孫年五歲時祖馨撫喬首曰所恨不見汝成人以所用硯與之祖歿父母告喬喬執硯涕泣晉王羲之率諸子抱弱孫一味之甘割而分之以娛

目前

父

孔子家兒不知罵曾子家兒不知怒所以然者生而善教也

後漢鄧禹子十三人各使守一藝教養子孫爲後世法

世說曰陳太丘詣荀季和使元方將車季方持杖長支尚小坐著車中旣至荀使叔慈應門慈明行酒餘六龍下食文若小坐膝前太史奏於時德星聚

魏王利名其子曰然曰沉名其子曰渾曰深曰吾

使汝曹顧名思義不敢違越也

晉劉殷字長盛有子七人各受一經一門之內七業俱成

晉王平子與人書稱其兒風氣日上足散人懷澄之第四子徵別傳云徵邁上有父風

梁沈約指其子謂陸喬曰此吾愛子也少聰慧好讀書因以青箱名之

母

孟子少時其舍近墓嬉戲爲墓間事孟母曰此非所

以居子也乃去舍市其嬉戲爲賈術孟母曰此非所以居子也乃徙舍學宮之側其嬉戲乃設俎豆揖讓進退孟母曰此真可以居子矣遂居之

漢雋不彥字曼卿爲京兆尹每行縣錄囚還母輒問有所平反活幾萬人不疑多所平反母喜笑飲食言語異於他時或無所出母怒爲之不食以故不疑爲吏嚴而不殘

晉陶侃母湛氏初陶貧賤湛氏紡績資給之使交勝已鄱陽孝廉范逵寓宿於侃時大雪湛氏乃撤所卧

新荐自剗給其馬又密截髮賣與憐人俱備饌達聞之嘆曰非此母不生此子

唐天平節度使柳仲郢母韓氏相國休之曾孫家瀆嚴肅常令粉苦參黃連和熊膽爲丸以授諸子每夜讀書使嚙之以資勤苦

繼母

漢翟方進辭其後母至京師受經母憐其幼隨之長安織屨以給進

東漢郭丹後母爲鬻衣裝賣產業與之從師長安

嫡母

隋番州刺史陸讓母馮氏性仁愛有母儀讓卽其孽子也坐贓當死將就刑馮氏蓬頭垢面詣朝堂數讓罪於是流涕嗚咽親持盃粥勸讓食既而上表求哀詞精甚切上愍然爲之改容於是集京城士庶於朱雀門遣舍人宣詔曰馮氏以嫡母之德足爲世範慈愛之道義感人神特宜矜免用獎風俗讓可減死除名復下詔褒美之賜物五百段集命婦與馮相識以

旌寵異

事父

漢杜延年爲御史大夫居父官府不敢當舊位坐卧皆易其處父杜周也

漢管寧年十六喪父中表愍其孤貧咸共貲贈悉辭不受稱財送終

唐狄仁傑登太行山親在河陽反顧白雲孤飛謂左右曰吾親舍其下瞻悵久之雲移乃得去同府叅軍鄭崇質母老且病當使絕域仁傑謂曰君可遺親萬里憂乎乃止

京兆舊事曰杜陵蕭彪字伯文爲巴郡太守以父老歸供養父有客常立屏風後自應使命

漢江革字次翁王莽之亂負母逃難以母老不欲動搖自在轅中挽車轉客下邳行傭供母人稱江巨孝東漢茅容字季偉年四十餘耕于野與等輩避雨樹下衆皆踞容獨危坐愈恭郭林宗見而異之因詣寓宿容殺鷄爲饌林宗謂爲已設旣而以供其母自以菜蔬與客同飯林宗起拜之曰卿賢乎哉因勸就學

漢蔡邕字伯喈性篤孝母滯病三年自非寒暑節變未嘗解襟帶不寢寐者七旬與從父從弟同居三世不分財鄉黨高其義

魏程堅字謀甫南陽人磨鏡養母母喪哀號櫪下有馬每聞堅哭輒淚出蹙較芻草

晉山濤遭母喪歸鄉里濤雖年老居喪過禮手植松栢

晉王修母以社日亡來年社日修哀感悲號隣人爲之罷社

五代張遂清爲淄州刺史迎其母及郊親爲母執轡
行數十里州人以為榮

梁徐孝克母患病欲粳米爲粥貧不能常辦母亡後
孝克遂終身啖麥有遺粳米者對之悲泣不忍食
南史張敷生而母亡數歲便有感慕之色十歲求母
遺物惟得一扇乃緘藏之每至感思開筭流涕

唐崔渾爲侍御史母有疾渾跪請病受已有頃覺病
從十指人俄而遍身母所苦遂愈

事繼母

閔損蚤喪母父娶後妻生二子母嫉損所生子衣綿絮衣損以蘆花絮父冬月令損御車體寒失朝父察知之欲遣後母損啟父曰母在一子寒母去三子單父善其言而止母亦感悟遂成慈母

後漢胡廣年八十心力克壯爲太傅繼母在堂朝夕省膳傍無几杖言不稱老母卒居喪盡禮三年

事嫡母

梁中軍田普行參軍廐沙彌嫡母劉氏寢疾沙彌晨昏侍側衣不解帶或應針灸輒以身先試及母亡水

聚不人口累日

事庶母

北齊南汾州刺史劉豐八子俱非嫡妻所生每一子所生喪諸子皆爲制服三年武平中悼所生母喪諸弟並請解官朝廷議而不許

事生母

宋司農少卿朱壽昌天長人字叔康父異守京兆時妾劉有娠爲嫡母妬害出嫁民間生壽昌數歲乃還父家母子相別不相聞者五十年壽昌旣仕行四方

求之不得與人言輒流涕然寧祗知廣州軍與家人
訣棄官人秦誓不見母不還行次同州避雨旅舍見
老婦冒雨抱薪而來投舍嘆曰吾兒壽昌安知母如
此之苦乎壽昌聞愕然近前問故乃知爲生母也年
已七十餘矣壽昌勉同母所生弟妹皆歸爲買田宅
居之居數年母卒壽昌哭泣幾喪明

伯叔愛侄

漢馬援字文淵兄子嚴敬並喜譏議援在交趾還書
戒之曰吾欲汝曹聞人有過如聞父母之名耳可得

聞口不可得言好議論人短長妄是非正法此吾所
大惡也寧死不願聞子孫有此行也

漢第五倫字伯魚或問倫曰公有私乎對曰吾兒子
嘗疾一夜十往退而安寢吾子有疾雖不省視竟夕
不眠若是者豈可謂無私乎

漢蔡邕蚤喪二親年踰三十鬚髮二色叔父親之猶
若幼童車則對坐食則比豆

後漢淳于恭兄崇卒恭養孤幼教訓學問有不如法
反自插以感悟之見慚改過

後漢范遷爲司徒。裁有一宅。復推與兄子及姪子。建自田種。置宅三畝。時人美之。

晉王羲之深爲從伯導所器嘗謂羲之曰。汝是吾家佳子弟。當不減阮主簿。

南齊王僧虔固辭開府。謂兄子儉曰。汝任重於朝。行登三事。我若復有此授。乃是一門有二台司。吾實懼焉。累年不拜。儉作長梁齋。制小過度。僧虔視之不悅。竟不入戶。儉卽日毀之。

呂僧珍字元瑜。以取慈爲業。及貴。兄子求官於元瑜。

曰汝等自有常業但當速歸慈肆耳不聽

賢叔母

晉謝瞻幼孤叔母撫育有恩同于所生

事伯叔父母

李孟元修易論語大義畧舉質性恭順與叔子就同居就有病疾孟元推所有田園悉以讓就夫婦紡績以自供給

唐柳公綽有家法諸子仲郢皆束帶定省於中門之外公綽卒事公權如父每見未嘗不束帶爲京兆尹

時遇公權必下馬端笏立公權暮歸必束帶迎侍公
權屢以爲言仲郢終不以官達少改

事伯母

晉羊祜年十五而亦事伯母蔡氏以孝聞

夫婦

春秋時晉曰季使過冀見冀缺耨其妻饁之敬相待
如賓與之歸言諸文公以爲下軍大夫

漢鮑宣妻桓氏字少君宣嘗從少君父學父奇其情
苦以女妻之裝送甚盛宣不悅曰少君生富矜習美

飾吾貧賤不敢當禮妻曰大人以先生修德守約以
賤妾侍巾櫛既奉承君子惟命是從宣笑曰是吾志
也乃悉歸侍御服飾更着短布裳與宣共挽鹿車歸
鄉里拜舅姑畢提甕出汲修行婦道

漢梁鴻字伯鸞勢家慕其高節多欲女之鴻竝絕不
娶同郡孟氏有女曰孟光壯肥而黑擇對不嫁至年
三十父母問其故曰欲得賢如梁伯鸞者鴻聞而聘
之女求作布衣麻屨織績之具後去吳依大家臯伯
通居廡下爲人賃舂每歸妻爲具食舉案齊眉伯通

察而異之曰彼庸能使其妻敬如此非凡人也

舅姑

范文正公之子純仁娶婦將歸或傳婦以羅爲帷幔者公聞之不悅曰羅綺豈幃幔之物耶吾家素清儉安得亂吾家法敢持至吾家當火於庭

胡安定公云嫁女必須勝吾家者娶婦必須不若我家者或問其故曰嫁勝吾家則女之事人必欽必戒娶不若吾家則婦之事舅姑必執婦道

事舅姑

漢樂羊子從學七年不返妻嘗躬勤養姑嘗有他舍
鷄謬入園中姑盜殺而食之妻對鷄不食而泣姑恠
問其故妻曰自傷居貧使食他肉姑竟棄之

漢班昭年七十餘卒所著賦頌銘誄問注哀辭書論
上疏遺令凡十六篇子婦丁氏爲撰集之又作大家
讚焉按照子曹慈丁氏慈妻也

凡愛弟

漢姜肱字伯淮彭城廣威人家世名族與弟仲海季
江皆以孝行著與弟同被卧甚相親友及長相愛不

能相離

漢薛包好學敦行弟求分財異居包不能止乃中分其財奴婢取老弱者曰我與共事久矣田園取其荒者曰吾少時所理意所願也器物取其朽敗者曰吾素所服食身口所安也

漢蔡邕與從弟同居三世不分財

晉王徽之與弟獻之俱病篤有術人云人命應終而有生人樂代者則死者可生徽之曰吾才位不如弟請以餘年代之

隋田真與弟廣弟慶偶因婦言欲議分居庭有三荆
同本甚茂經宿忽萎黃真大驚曰荆尚然况兄弟乎
遂不分荆復舒茂

隋牛弘弟弼好酒而酗嘗因醉射殺弘駕車牛弘還
宅夫人迎謂曰叔射殺牛弘聞之無所恠問直答曰
作脯其妻又言叔射殺牛大是異事弘言已知顏色
自若讀書不輟

弟愛兄

漢鄭均兄仲爲縣吏受遺均諫不聽遂脫身出歲餘

得數萬錢歸與兄日錢盡可復得爲吏坐贓終身捐
棄兄感悔遂爲清白吏

東漢魏霸字喬卿濟陰人爲鉅鹿太守妻子不到官
舍念兄嫂在家勤苦而獨尊樂故常服麻糲不食魚
肉婦親蠶桑子躬耕與兄弟子同苦樂鄉里慕其行
化之

晉裴叔則營新宅甚麗當移住與兄共遊牀帳綬然
軒樞踈朗兄心甚欲之而口不言叔則心知其意便
推使兄住

愛前兒

漢楊厚字仲植母與前妻子博不相安厚年九歲思
令和親乃托疾不言不食母知其旨懼然後改意思
養加篤

事嫂

漢馬援兄況卒行服期年敬事寡嫂不冠不入廬

漢第五訪字子謀少孤貧傭耕以養嫂

唐王珪奉寡嫂盡禮家事咨而後行教撫孤姪雖其
子不過也

姊妹

晉汝南王湛既婚郝氏而司徒渾婦鍾亦太傅曾孫
姊妹雅相親重鍾不以貴凌郝郝亦不以賤下鍾
李光進弟光頰先娶而母委以家事及光進娶母已
亡弟婦封貲貯納管鑰於媼光進命返之曰姊妹事
姑且嘗命主家事不可改因相持泣乃如初

姊愛弟

漢曹壽妻大家班超之妹也超爲都護在絕域年老
思入玉門媼乃上書曰妾兄超延命沙漠三十餘

年骨肉生離不復相識上因徵超還

漢賈逵年五歲其姊聞隣家讀書每抱逵聽之逵年十歲乃暗誦六經姊曰吾未有教入門汝安得三墳五典讀之逵曰憶昔抱聽隣家讀書

晉壽張女子張雨蚤喪父母年五十不肯嫁畱養孤弟二人教其學問各得通經皆爲聘娶成善士胡夷吾爲令荐于州府使各選舉表復雨門戶

事姊

子路有姊之喪可以除之矣而弗除也孔子曰何不

除也子路曰吾寡兄弟而弗忍也

晉庾倬爲河南兵曹有寡姊在家時洛中物價翔貴
難致口腹庾常于公堂饜已饌以餉其姊謬云所愛
小男以餉之同官初甚鄙笑後知之感而嘉嘆

唐蘇頲事寡姊有禮世稱其德

唐英公李勣貴爲僕射其姊病必親爲燃火煮粥火
焚其鬚姊曰僕射婢妾多矣爲何自苦如是勣曰豈
爲無人耶願令姊年多勣亦老雖欲从爲姊煮粥復
可得乎

姑

北史崔巨倫有姊明慧有才行因患眇一日內外親族莫有求者其家議欲下嫁之巨倫姑趙國李叔胤之妻聞而悲感曰吾兄盛德不幸蚤世豈令此女屈事卑族乃爲子翼納之時人嘆其義識

女子

漢文帝時齊太倉令淳于意有罪當刑詔獄吏繫長安意嘆曰生女不生男緩急終非益其少女緹縈上書願沒入爲官婢以贖父刑罪使得自新天子憐愍

蘇氏家語

人

十五

其意詔除肉刑

漢逸民戴良五女並賢每有求姻輒便許嫁練裳布被竹筥木屐以遺之五女並能遵其訓

宗族

宋韓魏公琦合宗族百口衣食均等無異嫁孤女十餘人養育諸姪比于已子所得恩例先及旁族逮其終子有褐衣未命者追葺祖塋上及五世皆買田植松槽

宋范純仁官至宰相前後任子恩多先疎族其親族

有請教者純仁曰惟儉可以助廉惟恕可以成德

宋劉率字子平號浸堂先生每月旦必治湯餅會族
曰今日之集非以酒食爲禮也尋常宗族不睦多起
于情意不相通則言入焉今月必會飲有善相告有
過相規有故相抵牾者彼此一見亦相忘於杯酒從
容間豈小補哉有不至者必再三招之曰寧適不來
後我弗顧

外祖

隋皇甫績三歲而孤爲外祖韋孝寬所鞠養嘗與諸

外兄博奕孝寬督以嚴訓籍命左右自杖孝寬聞而對之流涕由是博涉經史

舅甥

秦康公之母晉文公之妹也康公爲太子時母卒送文公於渭陽念母之不見也我見舅氏如母存焉

晉魏舒字元陽少孤爲外家竈氏所養竈氏起宅相者曰當出貴甥舒曰當爲外家成此宅相

晉荀勗依舅氏十餘歲能屬文從外祖魏太傅鍾繇曰此兒當及其曾祖

王悅造其舅范甯甯曰卿風流俊望後來之秀悅曰
不有此舅焉有此甥

晉邾鑿永嘉末天下大亂甚窮餒鄉人以其名德共
飴之鑿嘗携兒子邁及外甥周翼二小兒往食鄉人
目各自饑困以君之賢欲共濟君耳恐不能兼有所
存鑿於是獨往食訖輒含飯着兩頰間還吐以與二
兒後並得存

唐姚崇外甥任奕任異少孤養于崇家崇曰外甥非
疎但別姓耳遺與兒姪連名

翁婿

晉樂廣女婿衛玠時人語曰婦翁水清女婿玉潤

姨中表

晉陽城太守梁柳皇甫謐從姑之子也嘗之官人勸謐餞之謐曰柳爲布衣時過吾吾送不出門食不過鹽菜貧者不以酒肉爲禮今作郡而送之是責陽城太守而賤梁柳豈中古人之道是非吾心所安也

唐狄仁傑爲相有盧氏堂姨止一子梁公嘗往候盧姨安否曰某今爲相表弟有何樂從願悉力以從其

庶姨曰相自貴耳有一子不欲令其事女主人公大慙

僕婢

漢劉寬字文饒吏人有過但蒲鞭示耻而已夫人欲試之趨朝服畢使婢奉肉羹糝汚朝衣上寬神色不異徐謂婢曰美饗汝手耶

晉陶淵明爲彭澤令不以家累自隨送一力給其子書曰汝旦夕之費自給爲難今遣此力助汝薪米之費此亦人子也可善遇之

晉裴秀之母婢也秀年十八有令望而嫡母猶妬使

進僕于客見者皆起秀母曰當應爲小兒故也

宋張乖崖公詠知益州日單騎赴任官屬憚其嚴莫敢畜婢公不欲絕人情遂自買一婢以待巾幘自此官稍稍置姬媼公在任四年被召還闕呼婢父母出資以嫁仍處女也

每昌陳梁

五年壬申冬十月

崇禎卽位之五年

是月崔子還閩

崔子五竺從其父崔使君徵仲仕武林結社
聖湖一時遊仕武林者推洛陽才重愛之是
月之望以應舉還霍童

使君得韻字十箱

平仄字各六十爲一箱衆客列位賦詩不得
踰此百二十字此昔賢卽席限字佳事也

陳子與吳子借槎浮海

陳子將以十一月九日還秦海吳子今生寓
漢時星槎陳子乘之而去因更號槎翁

徵仲以韻籍贈陳子

使君以子五竺歸衙齋唱和無人遂以韻籍
爲陳子贈行其詞曰我有韻友侍君左右夏
尺樓頭呼朋命酒開篋分等如握我手

立約法九章

必罰六不成詩三杯澆潑一大杯擲地一大
杯侵一大杯曠而侵三大杯商各一杯

寬政三借音折字一小杯韻近似一小杯長
短絕句如意

韻箱六大功德頌

陳子頌曰與衆樂樂獨樂亦樂工拙皆天奚
矜奚作變亂生新無住無形驟引人勝久使
僮馴不招斯來不逐自散發意未寫雕刻灼

爛

僮諭

陳子曰此須賢師爰共之卽我僕不賢不可
試用也乃諭其僮曰乃拭案乃剃于儿乃請
客沐手乃盥乃置篋中坐乃分獻字箱乃各
陳無字格乃止童御無諱乃戒閤無濫入乃
退而治茗乃邀同石氏毛氏諸異姓兄弟紀
成乃旁求五大部族備咨問乃亂乃萃乃鎖
鑰之乃十襲之乃溫酒理壺觴乃無曠爾事

二十有六日鶴亭始社

槎翁陳梁記曰崔敬仲使君以限字韻籍
贈既立約之次日爲鶴亭載功之始集于
是役也使君賞幽首輪俸錢爲之同社徐仲
夔經理焉皆處士知己也而崔長公非石
趙雪舟恰以是日來自閩楊若木恰以是日
來自禾顧霖調恰以是日訪使君子湖上
集子寓既飯命舸往謁處士遂携限字籍
之使君雪舟若木仲夔各得五言古霖調得

七言絕非石得五言絕子得四言古使君有
却似花時媚幽塘進煖航騷臺荒臥柳萋藻
擁寒床之句雪舟有征駿經麓始命屐擬爲
誰覓岸呼漁艇釣鱗過硯池之句若木有壓
韻索紆險披荆憐寢竹之句仲夏有冷岫懷
偏洽孤岑筆闢奇及香滿雲蒸眼救蕪雪着
眉之句霖調有望舒孤嶺愜玄暉登臺響結
九臯飛之句非石有欲憇先坡美移軒赴鶴
汀之句子有主客雅泛興仰梅叟之句雖愈

率一時宇有限制而各如情事亦復勝彥書
以記之

十一月朔同社湖中話別

天目青道人張堦記曰壬申復月之朔陳則
梁盟兄將歸海上崔徵仲使君觴之湖中時
維序半三冬陽生一線方卜朋來无咎何期
之子懷歸雁嘯寒汀鷗吟淺渚長堤殘柳頻
懷送客之愁古岫蒼松尚表盟心之素使君
命茲畫舫列以綺筵餘瀝下醉于鮫人新聲

遠徹于川后繁華不殊金谷名彥更勝西園
爰發韻筭刻成蠟炬限以百十餘字就茲四
十駢詞使君逸藻先成而天機渾洽共矜倚
馬之才梁公苦吟後勁而氣韻沉雄足鼓攀
鱗之志雪舟雅如松雪仲凌卽是徐陵黃鶴
江楓諸崔競爽鳴琴賦雀二顧爭妍點韻則
有金生續貂是媿張子于時朔風未凜濛液
微沾逢賓主之咸良美情文於並茂湖山芬
其黠澹鷓咏釋我離憂詩成八韻體各一家

韻史終

韻史

六

五